

四庫全書

史部

欽定四庫全書

皇清開國方略卷二十七

太宗文皇帝

崇德四年己卯  
四月至十二月

崇德四年夏四月辛丑征明兩翼軍凱旋睿親王多

爾袞等迎

駕於沙嶺堡

先是三月丙寅奉命大將軍睿親王多爾袞右翼  
安平貝勒杜度等自軍中遣兵部啓心郎占巴鄂

謨克圖巴圖魯碩爾克等齎疏至松山軍營

太宗覽右翼疏無揚威大將軍貝勒岳託名大驚問占巴等奏言貝勒岳託及輔國公瑪瞻俱病卒

太宗慟哭久之

命且勿使禮親王知左翼多爾袞疏曰臣等率兵毀明邊關而入兩翼兵約會於通州河西由北邊過燕京至涿州分兵八道一沿山下一沿運河中六道于山河中間長驅並進燕京迤西千里內六府俱已蹂

躡至山西界而還復至臨清州渡運糧河攻破山東濟南府至京南天津衛克城四十餘座降者六城敗敵十七陣俘獲人口二十五萬七千八百八十右翼杜度疏曰臣等從燕京西至山西界南至山東濟南府共克九城降者二城敗敵十六陣殺其二總督及守備以上官共百餘員生擒一親王

朱由棧

一郡王

朱慈

一奉國將軍

朱慈

俘獲人口二

十萬四千四百二十有三金四千餘兩銀九十七

萬七千四百兩有奇次日集衆宣示兩翼捷音越  
十日睿親王多爾袞安平貝勒杜度等遣往迎大  
軍之武拜希爾根等齎疏還奏左翼軍從遷安縣  
凱旋經太平寨出青山關明兵于關上迎戰又以  
兵襲我後為我軍擊敗十一陣獲馬一百七十有  
二于三月初七日已盡出邊右翼軍出明邊青山  
口恐左翼軍出口時有敵兵來拒從太平寨遣管  
旗大臣葉臣譚泰率領將士往奪其關共敗敵十

三陣獲馬六十匹亦于三月十一日盡出邊丙子遣官還

盛京

諭留守鄭親王濟爾哈朗曰征明兩翼軍約三月盡四月初可還盛京令每旗一章京每牛录一撥什庫齎餉往迎大軍及俘獲人口不論甲士廝卒每人約攜十人口糧仍選識路之人令其前導從藩城渾河一路往迎乙酉左翼軍回

盛京夏四月己亥右翼軍以岳託瑪瞻喪至殯岳託  
于城外西南隅其福晉從死焉至是

車駕將還留守鄭親王濟爾哈朗同凱旋王貝勒等于城  
外四十里迎候

太宗至沙嶺舊邊外五里凱旋王貝勒等先令都察院承  
政阿什達爾漢兵部承政伊遜吏部參政覺羅薩  
壁翰等于道傍跪奏曰右翼揚威大將軍貝勒岳  
託輔國公瑪瞻病卒于軍中

太宗哭之下馬席地坐禮親王代善痛哭仆地

太宗哭良久復上馬謂代善曰此非可久駐之所也姑且還家哭之因

命左右扶代善上馬

太宗哭且行代善復哭仆于馬下

太宗立馬以待令二人扶掖乘馬而行至沙嶺堡諸王貝

勒道傍跪迎

太宗下馬入行幄坐而痛哭以茶酒遙奠岳託畢諸王貝



勒等行三跪九叩禮睿親王多爾袞等跪奏臣等  
往征明國仰荷

皇上威福毀其邊牆破其城堡所至之地縱橫無敵今已  
奏凱還朝遂以次至

御前行抱見禮

迴鑾至

盛京不入宮

御崇政殿遣王以下諸大臣詣岳託喪次奠酒比日暮復

命乃回宮

輟朝三日追封岳託為克勤郡王

賜駝五馬二銀萬兩

康熙二十七年十一月

聖祖仁皇帝命立碑以紀其功乾隆四十三年正月

皇上追念忠勛

命配享太廟以現襲之平郡王復封號曰克勤並遣貝子以下及

大臣等往奠瑪瞻喪次

賜駝馬各一銀二千兩

禮親王代善第六子無嗣

賜禮親王以下及諸大臣駝馬銀兩其出征將士分別

金史卷之二十七  
賞賚有差

五月丙子鄭親王濟爾哈朗自錦州師還

先是四月壬子

太宗遣前鋒將領錫特庫沙爾琥達等率官二十員甲士  
百四十人往略砍木燒炭之人並取牲畜錫特庫  
等至錦州遇敵兵擊敗之獲人口二十有二牛百  
有九驢二十有三以還

命以所獲

賜同往將士已未復

命鄭親王濟爾哈朗率貝子等及諸將士往略明錦州松  
山杏山等處濟爾哈朗自軍中奏報入邊以後敗  
明兵九次俘獲人口牲畜二千三百有奇至是師  
旋以所獲駝馬呈獻

太宗酌納之餘皆分

賜王貝勒大臣及朝鮮國王子李滢李湔續順公沈志祥  
等並出征各官有差

庚辰叙張家口開市功

太宗于三年六月內遣達雅齊塔布囊偉宰桑侍衛諾木  
圖偉徵率喀喇沁部畢喇什拉什希布等往明宣  
府北張家口與鎮守官議歲幣一如與喀喇沁貝  
勒之數並開關互市至是叙其功授達雅齊等世  
職加襲二次

賜喇嘛偉徵囊蘇貂裘一領銀百兩仍

賜號偉徵達爾漢囊蘇六月乙卯以牛录章京武達哩山

津亦曾與明人創議開市有功陞世職一等加襲

二次

六月戊子

賚錦州降人博塔漢布爾哈圖等

博塔漢布爾哈圖等自錦州來歸

賜以妻室奴僕房舍馬牛緞布等物並

賞給軍前來歸之生員茅瑞庭李天澤各人口十六牛四

丙申分漢軍為四旗

先是漢軍止二旗以石廷柱馬光遠分領之會石廷柱馬光遠于征明時鑄礮子不堅及攻臺詭稱礮子已盡下刑部議罪

太宗命大學士希福范文程剛林等赦廷柱光遠罪分二旗官兵為四旗每旗設領旗大臣一員梅勒章京二員甲喇章京四員牛录十八員正黃旗以馬光遠領之馬光輝張大猷為梅勒章京戴都崔應泰楊名遠張成德為甲喇章京正白旗以石廷柱領

之達爾漢金維城為梅勒章京金玉和佟國蔭佟  
岱為甲喇章京正紅旗以王世選領之吳守進孟  
喬芳為梅勒章京金礪郎紹貞王國光臧國祿為  
甲喇章京正藍旗以巴延領之李國翰佟圖賚為  
梅勒章京張良弼曹光弼劉仲錦李明時為甲喇  
章京初兩旗纛色皆用元青至是改馬光遠纛以  
元青鑲黃石廷柱纛以元青鑲白王世選纛以元  
青鑲紅巴延纛純用元青



戊戌定宗室陣傷加賞例

兵部承政伊遜參政葉克舒以公屯齊隨鄭親王  
濟爾哈朗出征被創奏請

賞賚

太宗命於定例外加

賜屯齊銀百兩嗣後凡公等被創俱照此例若宗室被創  
加賞二等覺羅被創加賞一等著為令

辛亥查銷明國敕書

初滿州隣近之哈達葉赫烏拉輝發蒙古諸國俱受明國敕書輸歲幣至是以諸國歸附教令一統明國敕書不應復存

命大學士希福范文程學士羅碩瑚球額色赫等悉收之焚于

篤恭殿前

秋七月丁巳修書與明國通好

是日遣前鋒將領努山瑚密色布丹巴蘭鄂謨克

圖鄂碩蘇爾德錫特庫率每旗前鋒五人章京四人甲士百人護送把總徐文師太監王朝進張福祿等至十三站與明崇禎帝

書曰朕見爾國軍民塗炭實惕於心屢欲通好以享太平之福曾與袁崇煥及宣太邊臣言之不啻再三奈爾國不從輕視民命樂於構兵以致失地喪師死亡百萬此非朕殺之實爾君臣自殺之也倘兩國通好此禍何從而來若謂朕之言和乃愚誘之計前此曾見朕既與人

和復有背盟之事耶且朕又何所迫而以計相誘也爾縱自謂防朕之計則得矣能保城池不失陷軍民不覆沒耶雖然朕今猶願與爾國通好也若果以禮交懼則朕為大清爾為大明各君其國又何崇卑上下之可爭自古天下非一姓所常有天運循環帝王代嬗有未成而中廢者有既成而復敗者

皇天無親善則培之否則傾之如和事果成則俘獲之親王郡王奉國將軍等一切釋還否則爾既骨肉之固念

朕養仇敵以何為朕實從民命起見

天地自能鑒之若疑朕既常言修好何又興兵不已試思  
和議未成何所據而罷兵必彼此定議誓告

天地然後可以罷兵息民矣

附陣獲明德王朱由棧等上  
崇禎帝疏曰臣等世受國恩

經今七世奈臣罪惡滔天失守封疆百姓塗炭臣罪  
何逭自被擒以來蒙大清

聖上未嘗加害皆推主上之情面也臣等日夜翹首專望  
施仁慈之恩念宗派之誼或兩國通和或贖臣等  
得歸故土臣六世祖塋再得奉祀萬世頂戴陣獲  
總督太監馮允昇致明當事各官書曰允昇於十  
月十五日陣前被擒現在瀋陽今欲議和常人尚  
惜生靈允昇可不念民命如兩國通好親王回國

昇等還朝干戈平定生靈幸甚先有幾次去議和  
之人及文書俱不能至御前此番萬不可隱藏有  
誤國事允昇不得面君  
祈將此書抄騰轉奏

八月己丑授宗室封爵

太宗加恩宗族錫以封號授貝子鎮國公輔國公鎮國將軍  
奉國將軍等爵俾子孫世襲各

賜誥命

辛亥以鎮國公扎喀納等疎脫逃人降罰有差  
先是

太宗命鎮國公扎喀納輔國公杜爾祜等率八旗官兵出

戍

諭之曰爾等此行當慎加防守修治弓矢器械勿忘習射

勿圖閒居雖有勇士器械不精亦無用也藩城新城各有援兵二百當預與之約有事速來應援嗣因內大臣多爾濟下蒙古人三漢人一攜馬五匹自伊魯地方逃去

太宗命扎喀納等布兵於藩城屏城間伺之復

諭以逃人必從彼路而出當急追獲之時扎喀納等以戌期將代還至途中聞

命復回既而逃人果從此出先獲其馬二匹追至哲爾里克地方以泥淖難行遂還兵部以扎喀納等疎脫逃人奏

太宗御崇政殿

召集王貝勒貝子文武大臣令扎喀納等跪於殿前

親訊之



諭諸王貝勒等曰朕嚮有定制凡追逃人先衝散其黨使彼各自分竄我兵稍休不必急遽俟其疲乏睡卧然後追之不遠即當就擒若未見逃人則分兵一半循踪追捕一半從間道出其前截之爾等豈未聞此言乎諸王貝勒等皆奏曰臣等嚮皆聞之

太宗復責扎喀納等曰爾等縱不能窮追亦必追至錦州大凌河廣寧而後還即不然亦當選捷健少壯者執弓挾矢伏於必經之路爾等前往廣寧一帶山下伺之如

此則逃人豈能如雁鷺飛翔水際耶一登陸則必獲之  
無得脫者矣奈何近繞藩城即自哲爾里克而還耶昔  
茂明安部下五貝勒逃已三月庫魯克達爾漢阿賴率  
外藩蒙古兵追至阿古庫克特勒地方斬其兵八百從  
人千餘全獲其家口牲畜又招服喀木尼堪部葉雷等  
閱八月始還事見天聰十年三月後葉雷復逃錫特庫追至北海  
斬之亦閱七月始還事見崇德二年六月爾等即不能追獲逃去  
七八月之人乃縱逸方出境之人以彼較此當何如耶

于是諸王大臣等議扎喀納等疎脫逃人之罪得

旨分別降罰

九月甲戌封朝鮮國王長子李滢為世子

朝鮮國王李倣以國中臣民願立長子李滢為世子不敢擅專請

命於朝事下禮部議覆

太宗如所請封李滢為朝鮮國王世子即於

盛京

賜以詰命仍

賜蟒緞一端素緞九端

丙子頒賞馬匹

先是七月乙亥

太宗召集諸王貝勒大臣等

命大學士剛林范文程學士羅碩等宣

諭曰天生馬牛所以供驅策備耕種也今國家荷承

天庥外藩貢馬既多牧場又復蕃庶不以與人將安用之

朕欲以馬千匹分給衆人自公以及管旗大臣下逮甲士不論滿洲蒙古漢人有願衝鋒破敵先登拔城為國効力者概准給與其或以既領馬匹恐不能効力行間致被稽察此不必慮也夫伊等果有心報効何事不可有為又或以從前未有顯績不敢領馬不知既往之事朕所弗究嗣後果能自効未為遲也凡願領馬者俱著赴兵部報名至是以浩齊特部巴琫土謝圖來朝貢馬太宗復出內廄馬千匹以百一十七匹

賜御前應賞者餘八百八十三匹

命親王郡王貝勒貝子大臣等俱詣演武場酌量分別

賞賚又出官馬千五百九十二匹不論牛录多寡令二十

旗均分散給牛录中貧乏無馬者

十一月甲寅朔肅親王豪格

九月己巳復爵

等敗明兵於寧

遠北山岡

先是九月癸酉

太宗命武英郡王阿濟格饒餘貝勒阿巴泰安平貝勒杜

度等率將士往略錦州寧遠十月丙戌復

命肅親王豪格貝勒多鐸等率兵繼之至是肅親王豪格等遣布丹占巴等自軍營奏報臣等奉

命西征有甲喇章京阿藍泰率蒙古四人來歸於左翼軍營明寧遠兵出北山岡為我右翼軍擊敗陣斬總兵金國鳳及其二子共斬三十餘人獲馬二十六匹即以所獲

賞被傷及有功將士是月復遣前鋒將領沙爾琥達蘇爾

德鄂碩布丹等率土默特部兵二百人往略寧遠諭之曰爾等從寧遠北界入沙爾琥達蘇爾德鄂碩布丹四人可前進誘敵令後隊伏於近邊臺軍瞭望不見之地若誘之不出則俟會齊同還仍從錦州北界略取樵採之人

十二月癸卯蘇尼特部長騰機思等率衆來歸

先是正月甲戌蘇尼特部台吉超察海率十戶來歸丁亥右翼台吉噶布楚塘古特卓特巴什達喇



等率百二十戶來歸夏四月台吉莽古思率三十戶鄂爾齊率四十戶及同部之巴圖賴額思赫爾僧格等先後來歸

太宗俱酌納其所獻馬匹各

賜朝服帽韉鞋帶甲冑弓矢等物十二月庚寅左翼部長騰機思率族屬一百十四人右翼部長素賽率族屬六十七人偕阿巴噶部長多爾濟由喀爾喀來歸行至烏珠穆沁地先遣頭目朝貢越十有二日

騰機思等至

盛京

命親王以下大臣以上迎宴於演武場次日

太宗御崇政殿騰機思等率衆朝見奏言我等聞

寬溫仁聖皇帝功德隆盛傾心嚮慕各率所屬歸附貢獻  
方物奏訖行禮畢各獻駝馬酌納之

召宴清寧宮次年正月

賜騰機思素賽及騰機特莽古岱哈爾呼喇佈達什希布

阿玉什噶爾瑪塞稜額爾克辰寶茂海伊勒畢斯  
等甲冑弓矢貂鑲朝衣蟒衣帽韉鞵帶皮張銀幣  
等物有差以騰機思部下阿布圖自朝見以來往  
來効力可嘉

賜名達爾漢給世襲

誥命

乙巳定外藩行獵獻獸之數

太宗諭理藩院曰外藩諸王貝勒行獵所獲之獸若俱令

來獻未免勞民且致驛馬疲敝今後以行獵來獻者止  
用鹿豕各二如無鹿豕可獻麕子黃羊共九數

庚戌朝鮮國王李倣立碑紀

恩

朝鮮國王李倣感

太宗歸其妻子復其國土樹碑三田渡地方頌

上功德傳示萬世先以其事入奏

太宗遣內院官察布海李棲鳳弼里克圖戶部承政瑪福

卷二十七  
塔等往觀之錄其碑文進

呈其文曰大清崇德元年冬十有二月

寬溫仁聖皇帝以敗和自我始赫然怒以武臨之直擣而  
東莫敢有抗者時我寡君棲於南漢凜然若履春  
冰而待白日者殆五旬東南諸道兵相繼奔潰西  
北帥逗撓峽內不能進一步城中食且盡當此之  
時以大兵薄城如霜風之捲秋籜爐火之燎鴻毛  
而

皇帝以不殺為武惟布德是先乃降

敕諭之曰來朕全爾否則屠之有若英瑪諸大將承

皇命相屬於道於是我寡君集文武諸臣謂曰予托和好

於

大邦十年於茲矣由予昏惑自速

天討萬姓魚肉罪在予一人

皇帝猶不忍屠戮諭之如此予何敢不欽承以上全我宗

社下保我生靈乎大臣協贊之遂從數十騎詣軍

前請罪

皇帝乃優之以禮拊之以恩一見而推心腹

錫賚之恩遍及從臣禮罷即還我寡君於都城立招兵之  
南下者振旅而西撫民勸農遠近之雄舉鳥散者  
咸復厥居詎非大幸歟小邦之獲罪

上國久矣已未之役都元帥姜功烈助兵明國兵敗被擒  
太祖武皇帝止留功烈等數人餘悉放回

恩莫大焉而小邦迷不知悟丁卯歲今

皇帝命將東征本國君臣避入海島遣使請成

皇帝允之視為兄弟國疆土復完功烈亦還矣自茲以往  
禮遇不替冠蓋交跡不幸浮議煽動構成亂梯小  
邦申飭邊臣言涉不遜而其文為使臣所得

皇帝猶寬貸之不即加兵乃先降

明旨諭以師期丁寧反覆不翅耳提面命而終未免焉則  
小邦羣臣之罪益無所逃矣

皇帝既以大兵圍南漢而又命偏師先臨江都宮嬪王子



暨卿士眷屬俱被俘獲

皇帝戒諸將不得擾害令從官及內侍看護既而大沛

恩典小邦君臣及被獲眷屬咸歸於舊霜雪變為陽春枯

旱轉為時雨區宇既亡而復存宗社已絕而還續

環東土數千里咸囿於

生成之澤此實古昔簡策所希覲也於戲盛哉漢水上游

三田渡之南即

皇帝駐蹕之所也壇場在焉我寡君爰命水部就其所增

而高大之又伐石以碑之垂諸永久以彰夫

皇帝之功之德直與造化而同流也豈特我小邦世世永

賴抑亦

大朝之仁聲武誼無遠不服者未嘗不基於茲也顧摹天  
地之大日月之明不足彷彿於萬一謹載其大略銘  
曰天降霜露載肅載育惟

帝則之并布

威德

皇帝東征十萬其師殷殷轟轟如虎如貔西番窮髮暨夫  
北貉執殳前驅厥靈赫濯

皇帝孔仁誕降

恩言十行昭回既嚴且溫始迷不知伊戚自貽

帝有明命如寐覺之我后祇服相率而歸匪惟憚威惟  
德之依

皇帝嘉之澤洽禮優載色載笑爰束干矛何以錫之駿馬

輕裘都人士女乃歌乃謳我后言還

皇帝之賜

皇帝班師活我赤子哀我蕩析勸我穡事金甌依舊翠壇  
維新枯骨再肉寒芳復春有石巍然大江之頭萬  
載三韓

皇帝之麻

皇清開國方略卷二十七

欽定四庫全書

皇清開國方略卷二十八

太宗文皇帝

崇德五年庚辰

崇德五年春正月甲子遣翁阿岱等戍錦州

太宗遣翁阿岱多濟里等率官兵戍防錦州

命貝勒多鐸授以軍律曰爾等此行凡我國逃亡及敵人寇邊須善防之若接戰即選前鋒將士之精銳者以一隊居前二隊居後使與交鋒彼兵敗遁我軍不得遽還

當收軍截其歸路乘其無備盡殲之至追捕逃亡必量其衆寡當親往者以身先之倘人衆勢強勿得輕戰惟與相持傳知附近城堡待衆軍會集相機勦伐所領士卒宜時時練習騎射繕修器械毋令偷安縱飲

閏正月癸未朔察民間冤抑

太宗諭各管旗大臣曰今遣爾等往各處地方稽察窮民審理冤獄爾等當親至所屬各屯堡巡行周視毋使民間冤抑不得上聞

甲申

諭禮部定迎送朝鮮國王諸子例

朝鮮國王李倬於崇德二年冬上疏陳情求遣其

子李滢等歸省

疏云臣之二子入侍半年有餘過蒙

恩恤有逾骨肉感激銘佩復何敢言第臣向有犬馬賤疾父子久離寸情難禁亡妃再期迫在冬李變除之節禮俗所重人子情理誠可矜念倘蒙

陛下俯察微忱俾得釋終天之慟則區區情願於是畢矣

謹奏

太宗不許正月甲子朝鮮陪臣以國王病篤具文申達禮



部求部臣轉奏

太宗覽奏以

敕諭國王李倬曰朕原以爾國反覆不常質王二子爾果忠誠實著不特世子可以往來無間即諸子之在彼在此又何計哉然則二子之不歸非朕不使之歸因爾自疑以致朕疑耳今依所請遣世子歸省爾可將現留本國之子及世子李湏子送至鳳凰城更換而還朕待爾毫無他意欲令諸子互相往來勿替朕命爾至是

諭禮部定迎送朝鮮國王諸子例凡國王子來朝一宴於

鳳凰城再宴於

東京又宴於

盛京送歸時亦如之若世子往來

盛京則貝勒迎送其諸子則禮部承政以下迎送若  
其子往來

東京則禮部參政迎送往來鳳凰城則禮部理事官

迎送後李滄於二月丙寅歸省

賜李滢及尚書沈大淵以下官屬貂裘雕鞍馬匹貂皮白  
金有差仍

命管禮部貝勒杜度承政滿達爾達參政超哈爾等於五  
里亭宴之

二月丙辰遣多濟里等往征烏扎拉部

太宗遣多濟里喀珠等率八旗甲士八人嚮導四人往寧  
古塔會同章京鍾果兌達敏等酌帶兵三四百名  
往征烏扎拉部

諭曰爾等此行或由水路或由陸路往返宜速務以兵扼其重地若得其地將遲悞貢獻及欺誑之人執之以歸凡事公議而行毋得怠忽多濟里等至烏扎拉俘獲百有十人於六月癸酉師還

命於五里外迎宴之以烏扎拉壯丁四十三人補各旗披甲之缺額者

賜多濟里喀珠鍾果兌等各貂皮五十布三十其從征將士各論功分

賞貂皮布疋有差

夏四月乙亥征索倫部師還

先是索倫部博木博果爾等於二年閏四月及三年十月來朝貢貂皮等物嗣復叛去四年十一月辛酉遣索海薩木什喀穆成額葉克舒永順拜伊遜羅奇等率官兵征之

命貝勒多鐸額駙英固爾岱傳

諭曰爾等所經屯內有已歸附納貢之屯又有博木博果

爾取米之屯毋候行侵擾行軍之際務哨前殿後勿忘紀律新附之人令該管大臣以下各官查核其有兄弟及殷實者方令從征爾等亦應詳驗之左翼軍薩木什喀領之副以伊遜右翼軍索海領之副以葉克舒兩翼軍分行則聽該翼將令同行則聽兩翼將令凡事俱公議行之本年三月己丑索海等遣章京法談宜爾格得奏言臣等至呼瑪爾河分兵各旗派定地方攻取因道遠定期四十日至鑲藍旗所派烏蘭海倫屯

乃令承政伊遜率每旗官一員每牛录兵二人往  
拉里闡地方伊遜等既行有鐸陳阿薩津雅克薩  
多金四木城人抗拒不降令右翼將領葉克舒拜  
阿哈尼堪譚布藍拜武巴海率每旗官二員每牛  
录下有俘獲之兵丁二人無俘獲之兵丁三人助  
之遂克雅克薩城當攻城時綏赫德所守汎地先  
舉火焚燒城南關廂八旗將領各率兵二十人前  
進和託率轟先入珠瑪喇離之俱以火攻克之有

達爾布尼阿恰勒都瑚伯庫都漢必爾岱四人聚  
七屯之人於烏庫爾城薩木什喀伊遜穆成額拜  
令衆軍乘旦攻之日暮克之至鐸陳力攻一日次  
日聞各路報博木博果爾以兵來援恐傷我軍遂  
還烏魯蘓屯之索倫鄂爾吞奇勒里精奇哩烏拉  
布丁屯以東烏木內克巴哈納以西黑龍江額爾  
圖屯以東阿里闡以西兩烏拉兵共六千來襲正  
藍旗後隊索海以兵設伏薩木什喀護輜重殿後



二人率衆掩擊斬殺甚衆生擒四百人博木博果  
爾既敗隨攻取其營正白正紅鑲黃三旗相繼馳  
入博木博果爾及餘衆二百俱遁薩弼圖卓布泰  
武班宜爾格得率兵九十人往助薩木什喀鐸陳  
阿撒津二城人以兵四百阻截我軍擊敗之斬五  
十人薩木什喀令伊遜率章京五員兵一百三十  
於鐸陳設伏斬七人又遣阿哈尼堪巴山郎圖薩  
祿等往攻卦喇勒屯屯內人來詣索海言屯內有

索倫兵五百索海喀喀木幹都等率兵往攻奪柵而入斬二百人生擒一百三十人據額駙巴爾達齊於三月十八日來會云惟我多科屯人未曾附逆其小烏拉各處兵皆往助博木博果爾及大兵所向克捷郭博勒屯之溫布特博和哩屯之額爾噴噶勒達遜屯之科奇納穆丹屯之諾奇尼都孫屯之奇魯特烏爾堪屯之博卓戶德篤勒屯之科約布魯七屯之人俱已歸附巴爾達齊別屯雖現

在逃竄不久終必來歸也并籍所獲人口皮張等  
細數以

聞癸巳

太宗命每旗官一員率兵往迎出征索倫大軍

諭之曰爾等此行如能過錫伯地方至克勒朱爾根處相

會可謂神速矣會後由哈爾必雅勒回軍沿途宜加意

防護入境時須從法庫門入不可由葉赫行以伊等習

知路徑恐再致逃亡也兵丁早晚放馬務令解鞍休息

尤須官為察看勿用外藩蒙古驛馬供應乙巳薩木什  
喀索海復遣當習郭查等奏言前次俘獲人口二  
千二百五十有四後自額蘇哩屯以西額爾圖屯  
以東又獲九百人共計男婦大小六千九百五十  
有奇馬四百二十有四牛七百有四又先後獲貂  
捨猓獾狐狼青鼠水獺等皮五千四百裘二十領  
至是凱旋

命禮部承政滿達爾漢及安平貝勒杜度饒餘貝勒阿巴

泰等先後迎宴將至

盛京

太宗復率親王以下大臣迎至實勝寺北館祭肅行禮宴  
勞之叙功分別加授世職

賜領翼主將索海及穆成額各貂皮七十七人口四葉克  
舒永順拜譚布藍拜等各貂皮四十七人口三其  
從征軍士按功分

賞貂皮人口並以所獲男婦五千六百七十有三人分隸

八旗編為牛录

賞給衣服布疋復令較射分別等第  
一等視甲喇章京二等視牛录章京三等視半個牛录各照等第

賜朝服袍褂等物

五月乙未

車駕至義州

先是三月己亥

太宗命鄭親王濟爾哈朗為右翼主帥貝勒多鐸為左翼

主帥率官兵往修義州城駐軍屯田使明國山海關外寧遠錦州地方不得耕種

親授方略行夏四月己未

命內國史院學士羅碩禮部啟心郎沃赫往

諭濟爾哈朗多鐸等曰朕本欲於四月十三日啟行前往

義州親臨相度今暫緩行爾等務宜盡心經畫越八日

羅碩等自義州還奏言我軍修城築室俱已完備

義州東西四十里田地皆已開墾有降明蒙古名

達藍泰者詣營投誠又獲錦州偵卒一名庚辰

命睿親王多爾袞肅親王豪格安平貝勒杜度饒餘貝勒

阿巴泰等留守

盛京

太宗率羣臣出舊邊巡行邊界

閱牧馬場向開城一帶行獵五月乙未至義州

閱視修築城垣建造房屋鄭親王濟爾哈朗貝勒多鐸率

駐防各官來迎



駐蹕戚家堡

戊戌分編來降索倫戶口

薩木什喀等征索倫部時來降者三百三十七戶  
共壯丁四百八十一人至是來降

太宗命理藩院參政尼堪率八旗護軍將士攜蟒緞素緞  
梭布往迎之

諭之曰爾等可令索倫來歸之衆同郭爾羅斯部衆於烏  
庫瑪勒格稜額埒蘇昂阿察喀地方駐劄耕種任其擇

便遷移視其中有能約束衆人堪為首領者投為牛录  
章京分編牛录爾等將攜去緞布以次給賞之尼堪等

遵

諭給賞分編八牛录乃還

甲辰征瓦爾喀部奏捷

先是東方瓦爾喀部衆叛入熊島崇德四年七月

太宗命朝鮮國王李倭以舟師攻熊島擒叛首嘉哈禪等

縛送

盛京將同謀叛逃之人分別議罪仍遣薩爾糾英古納爾泰錫圖等率兵百人往瓦爾喀收其餘黨

諭曰爾等可於拉發地方牧馬前進兵少宜合為一隊以行勿貪得輕殺勿妄取為俘抗拒者諭降之殺傷我兵者誅戮之歸附之人編為戶口令貢海豹皮諭以棄惡從善勉為良民軍行往返勿侵擾朝鮮境地薩爾糾英古等遂攜嘉哈禪同往收捕餘黨五百人本年閏

正月甲申

命戶部行文朝鮮國王令所在官員計口給糧俟我軍回  
時報明數目於額貢鳳凰城米內開除奏報並

敕諭薩爾糾英古等曰爾等所率軍士及收獲人口並嘉  
哈禪等所需口糧已諭令朝鮮計口給予勿令多索至  
所獲人口內有強暴不可信者約束前來餘俱仍留彼  
處擇其中可任使者一人統之如無可任使之人即付  
與先降之嘉哈禪賴達庫分管至是戶部啓心郎布丹  
等自

盛京至錦州

御營奏薩爾糾等俘獲男子三百三十六人歸降男子一百四十九人內有捕海豹二百四十三人捕貂鼠一百九十八人仍居彼地攜來者四十四人俘獲家屬七百九十六口歸降家屬四百八十一口攜來者八十三口又來朝之羌都蘇拉庫塞木得三人輝克地方朱吉喇一人及先降之賴達庫與嘉哈禪之子奇喇納艾都達松阿託和訥俱至尋以

所獲壯丁四十二人充補各旗披甲之缺額者其  
歸降一百四十九人及新獲二百九十二人俱留  
置駝朱屯中令每年貢貂皮海豹等物  
已酉勞薩等略地還

太宗於三月丙戌

命前鋒將領勞薩等率將士往廣寧捉生

諭曰爾等前去當自廣寧山後越其前坡勿渡大凌河回  
時當從廣寧山前而來往返俱宜迅速嗣又

命勞薩武拜等率前鋒兵同每旗護衛十名由中後所北

往略海濱一帶至是還奏勞薩等中後所北面入

勞薩駐其西武拜駐其東分兵一半沿海搜略獲

馬二十四牛一百六十三驢四十俘十六人殺二

百二十人

庚戌

車駕自錦州還

太宗自戚家堡至臧家堡之次日有降明蒙古多羅特部

民蘇班岱阿巴爾岱密遣其同部人托克托內來  
言我等三十家六十餘人情願歸降乞發兵來迎  
鄭親王濟爾哈朗等奏

聞

太宗諭曰蘇班岱等來歸爾等共率護軍一千五百往迎  
不必多帶從役彼處見我兵寡必來拒戰可分兵為前  
中後三隊前隊拒戰中後二隊陸續應援濟爾哈朗等  
率師遂行夜過錦州城南昧爽至杏山令托克托



內潛入臺報知蘇班岱等生擒漢人六名並攜其  
家資牲畜以行及黎明明杏山總兵劉周智率馬  
步兵沿城布列錦州總兵祖大壽領我兵寡令錦  
州遊擊戴明率馬兵七百人松山總兵吳三桂馬  
兵三千人及杏山劉周智兵三千人並杏山原駐  
馬兵三百人共兵七千協力迎戰松山錦州兵與  
劉周智合營分翼列陣進逼我軍濟爾哈朗等欲  
離城與其步兵相遠引退於杏山九里外明兵百

餘騎越衆呼噪而進濟爾哈朗遂縱兵還擊分隊  
衝入並與多鐸阿達禮羅洛宏博洛皆親自督戰  
大敗之追奔至城下始還陣斬副將楊倫參將李  
得位濟爾哈朗又遣其護衛兵及阿達禮羅洛宏  
護衛兵擊敗西面二營迎戰兵獲馬匹甲冑器械  
無算還過錦州先遣啓心郎額爾克圖占巴奏捷  
是日

太宗離營十五里往

閱錦州城額爾克圖等適至

太宗大悅即駐軍俟濟爾哈朗等至列森拜

天畢回營戊戌濟爾哈朗等以陣獲旗纛馬匹甲冑等物

進獻

賜鄭親王濟爾哈朗貝勒多鐸郡王阿達禮貝勒羅洛宏

貝子博洛內廐良馬各一以所獲

賜有功將士其杏山降人蘇班岱阿巴爾岱蘇當拜瑚賽

南泰托克托內額爾克滿扎爾阿噶賴等九人各

賜鑲領緞衣一襲尋授蘇班岱為三等甲喇章京復

賜寧遠降人布延圖博本白布得錦州降人真特卓哩克

圖訥岱布岱等七人緞衣各一襲庚子以大軍克捷

召諸王貝勒大臣等至臧家堡

御營大宴之次日移營葉家堡以捷音宣示留守

盛京諸王貝勒等士寅

親統八旗護軍騎兵向錦州進發

命漢軍攜紅衣礮前行至錦州東五里近臺布列舉礮攻

克其臺復

命內大臣侍衛等誘錦州兵出擊斬之乙巳復以礮攻錦  
州城北瞭馬臺擊死六人餘十三人下臺降遂盡  
刈錦州城東隅禾稼是日

閱視錦州城自東至南日暮還營有蒙古巴爾巴圖魯及  
材官王成名詣軍中降尋授王成名為牛录章京  
丁未戊申遣八旗軍士分刈錦州城西北禾稼越  
二日

回鑾

六月戊辰

諭朝鮮協濟兵米由陸路改運

先是

太宗命朝鮮總兵林慶業等率兵五千船一百十有五隻  
運米一萬包同戶部承政洪尼雅喀庫禮等由明  
錦州南小凌河大凌河口進發運至三山島船十  
六遭風壞其三溺死五人運至奇爾山橋船十一

遭風沉其四溺死七人又船三漂至明境俱為明國  
所獲其自旅順口運至北信口船二十五為石所壞  
明人獲所漂三船知有朝鮮兵船在途即發兵船  
三十八追至熊島北新臺截殺朝鮮八人傷十二  
人為火所燎者十二人二人躍入水中明人以鈎  
獲之又船二十九亦為石所壞僅存五十二船至  
益州慶業不能前進遂同洪尼雅喀庫禮遣人奏

太宗命大學士希福范文程剛林前往查驗慶業等言願從陸路負運若仍由水路士卒皆無生理矣希福等還奏復遣學士瑚球額色赫賚

敕往諭慶業等曰爾主李侗在南漢山見朕時曾奏云本國舟楫堅固利於對敵明人船隻甚脆不足當也今爾在途遷延歲月託言三舟漂沒暗通明國消息及見明國船隻不即迎敵復詭稱不利不能前進豈非與明國通謀耶朕視爾國為一家本欲同心協力以征明國故



調爾兵船爾國素善鳥鎗若用以力戰明人將奈爾何  
今以如許兵船僅遇明國三十八船尚不能敵縱復前  
行豈肯力戰耶且朕原不因糧糧虧少令爾齎送特因  
兵船之便故命順帶爾既不遵諭運至所約之處朕亦  
何須此米爾等或棄之道路或載歸本國水陸聽爾自  
便慶業大懼曰

聖諭如此我等雖死必從水路前往瑚球等因令暫止復

以其言回奏

太宗遣國史院學士羅碩等傳

諭慶業等准其由陸路前運止許率副將五員遊擊三員  
備禦五員兵一千廝卒五百同來其餘俱付該管  
官帶回本國其米用我軍運至益州耀州其陸路  
兵令於海州駐劄以俟馬匹

秋七月己酉睿親王多爾袞等連敗明兵於錦州

太宗於六月乙丑遣睿親王多爾袞肅親王豪格安平貝  
勒杜度饒餘貝勒阿巴泰等率其屬下將士之半

往義州代鄭親王濟爾哈朗等還是月乙酉睿親王多爾袞等遣筆帖式碩岱奏言我軍於錦州城西川未時明人馬步兵由城西北隅突出鎗礮並施因遣護軍兩隊左翼騎兵一隊令其分隊從旁衝擊我軍方進敵兵遽潰追至城壕掩殺之又遣護軍伏松山大路遇明總兵祖大壽遣二人齎書赴寧遠皆擒獲之攻克錦州城西九臺小凌河西岸二臺生擒四十人錦州城蒙古歸降者騎兵五

人步兵一人我左右兩翼軍遵

皇上前諭分駐於近城地方一則斷明人往來之路一則  
投誠之人可以乘便而來而禾稼成熟時我軍亦  
易於收穫不致為明人乘間竊刈今擬分兵駐營  
及收貯糧草之所奏請

上裁

太宗遣內祕書院學士額色赫

諭令王貝勒等酌將兩翼兵暫行分駐其已收糧草擇錦

州西山城堅固之城兩處存貯癸巳睿親王多爾  
袞等又遣恩國泰奏報初八日明錦州馬步兵五  
百夜襲我鑲藍旗營為我哨卒所覺貝子洛託等  
率兵擊敗之殲其八人十一日明總督洪承疇率  
四總兵及馬步兵四萬至杏山城外近壕下營臣  
等率護軍全軍並分騎兵一半前進明人以馬兵  
先出誘戰因令騎兵暫止先遣護軍將士迎擊追  
斬至城壕獲馬七十匹

太宗覽奏遣前鋒將領武拜率前鋒官兵一半往助之

諭曰爾等此行分兵二隊後隊令納海蘇爾德統之爾等  
所統前隊尤宜速往擇險要處屯駐若遇敵更視敵將  
突出之地以列陣並傳諭睿親王等敵兵來時但宜堅  
守壁壘俟其相近乃可擊之前次迎戰非計也辛丑額  
色赫還奏王貝勒等公議令管旗大臣圖爾格葉  
克舒護軍將領伊爾德蘇拜等率每旗護軍章京  
一員以兵三百伏於錦州西南烏忻河口收獲牲

畜敵人覺之以兵千餘襲我後隊圖爾格等收兵  
還擊斬百餘人獲馬十三匹至是左翼審親王多  
爾袞等擊敗錦州城馬步兵一千殺傷甚多獲馬  
一百有四右翼安平貝勒杜度等復從寧遠路遇  
明人自關內運米千石至錦州斬其步卒三百九  
十人獲駝馬牛羸三百九十有七遣瞻岱安泰瑪  
克占等奏

聞

九月辛卯睿親王多爾袞等敗明兵於松山

睿親王多爾袞等先於八月乙亥奏報七月二十  
九日右翼安平貝勒杜度等率前鋒護軍全軍及  
騎兵一半前往錦州遇明兵出城刈草追斬八十  
六人獲其牲畜還睿親王多爾袞等遣左翼前鋒  
及護軍馳略獲米十五車先被我右翼陣斬之人  
敵人將取尸復與我軍遇盡殲之八月乙卯前哨  
章京格巴庫率甲士十人往探大凌河海口獲船



二隻斬三十五人敵人夜入義州於屯田所傷我  
滿洲官兵三人家屬八十九名我軍於次日追及  
後隊斬之至是復遣羅碩吉賽等奏報九月九日  
止留每牛录下騎兵二人守營王貝勒等悉衆往  
杏山城北之山巔見兵馬自杏山城出者甚少我  
軍方誘敵時諜報松山騎兵已出王貝勒等率兵  
馳往遣護軍章京擊敗之及還敵復以馬步兵來  
襲相距五里縱騎兵及護軍擊敗之掩殺至松山

城下獲其馬匹甲冑等物比還松山兵復至復令  
官軍迎擊敗之敵乃遁共擊敗總督一員總兵七  
員士卒五萬獲馬一百二十甲五百七十

冬十月壬申

萬壽節

頒詔肆赦

先是秋七月戊戌大赦凡死罪以下羈禁者皆集  
於

大清門釋之至是

太宗諭諸王貝勒貝子大臣等曰今日乃朕誕辰朕普賜恩澤自諸王大臣以下及庶民罔不沾被即有罪之人亦欲推恩及之除十惡外凡罪概行肆赦因

命內院大臣宣讀赦詔畢

太宗乃御殿受朝賀

十一月戊寅朔免朝鮮歲貢米什之九

詔諭朝鮮國王李倬曰十月二十五日乃朕誕辰實中外

希恩之日也想爾國歲貢米萬包皆取給於民今減去  
九千包止貢千包俾爾臣民同心懽戴

乙酉鄭親王濟爾哈朗等連敗明兵於錦州

太宗於九月丙戌

命鄭親王濟爾哈朗武英郡王阿濟格郡王阿達禮貝勒

多鐸羅洛宏等率領滿洲蒙古漢人將士各半往

代審親王多爾袞等圍錦州松山至是鄭親王濟


爾哈朗等遣啟心郎額爾克圖等奏報多鐸率護

軍及騎兵一千五百夜往錦州西桑噶爾齊堡設  
伏見敵人四騎即發前鋒追擊敵伏兵出戰多鐸  
率兵迎擊追至塔山陣斬八十六人獲馬二十濟  
爾哈朗率將士夜伏錦州南次日見敵數騎誘之  
不至敵伏兵望見我軍即望城遁走追斬六十餘  
人又聞敵人於杏山塔山間夜運芻糧隨令宗室  
輔國將軍務達海率兵乘夜往略追斬五十餘人  
生擒五人獲牲畜百餘

十二月辛未嚴察漢軍兵丁代替者

都察院參政張存仁奏言我漢軍出征多攜子弟  
當更番時每令家人代替恐臨陣不力久而逃亡

太宗命嚴察之



皇清開國方略卷二十八

欽定四庫全書

史部

皇清開國方略卷

二十九  
五十三

內閣中書臣沈鵬覆勘

總校官原任侍講臣王燕緒



欽定四庫全書

皇

清國方略卷五十九

太

宗文皇帝

崇德五年八月

崇德六年春正月壬辰錫特庫等自索倫部擒獲博

木博果爾還

先是五年三月博木博果爾敗亡後七月丙午

太宗命錫特庫濟什哈率護軍並徵兵外藩往征之

命內大臣巴圖魯詹理藩院參政尼堪等

諭外藩蒙古曰教漢柰曼烏喇特阿魯科爾沁四子等部  
從征將士俱彙集扎魯特部內齊地悉令較射選壯  
勇者二百四十名令錫特庫將之以行以伊爾罕固  
圖哈納綽隆為嚮導其從役駝馬甲冑器械糗糧俱  
細加檢閱毋忽十二月庚申錫特庫等遣歸亨岱青  
蒙格圖艾達漢邁圖以擒獲博木博果爾報次  
日

太宗遣貝子洛託齋

敕往錦州

諭鄭親王濟爾哈朗等曰博木博果爾自叛後抗拒我軍  
彼時朕已定計欲令其北遁以便擒獲故陽言我軍將  
於黑龍江牧馬必擒博木博果爾彼聞此言果北遁朕  
已知之未及與爾等共議即命錫特庫濟什哈率外藩  
蒙古兵從蒙古北邊追躡錫特庫等越兩月十三日至  
甘地獲其弟及家屬又閱十四日至齊洛台地方遂獲  
博木博果爾及其家屬男婦幼穉共九百五十六人馬

牛八百四十有四特諭知之至是凱旋遣官迎宴于北

驛館次日

召錫特庫濟什哈及從征之護軍四十人外藩台吉等三

十三人

賜宴仍

命諸王貝勒各宴一次擢錫特庫世職一等

賜阿魯科爾沁部台吉阿玉什扎魯特部台吉桑古爾烏

喇特部台吉布達齊四子部將領博內教漢部將

領色穆朶曼部將領扎丹等蟒緞朝衣貂裘捨剎  
獬裘狐裘豹裘冠帶甲冑橐韃弓矢銀兩緞布等  
物有差

二月己未罷各牛錄章京之不職者

先是

太宗命戶部清查滿洲蒙古十六旗牛錄各以人口牲畜  
註冊分別貧富具奏部臣覆奏宗室拜音圖下武  
賴等四十八牛錄俱貧

太宗集衆于

篤恭殿

諭之曰此等貧窮各牛录豈行陣時獨禁其俘獲耶豈嘗于衆人之外加派徭役耶抑豈旱澇偏災之獨異於衆人耶皆因該管各章京等嗜酒曠職董率無方爾王貝勒大臣等又不查明更置戶口何從而殷富著將貧窮各牛录之該管章京俱解任另選才能者任之同日又諭曰爾等何不親率子弟習射耶子弟中壯者令以角弓

羽箭習射幼者令以木弓柳箭習射我國所恃全在乎  
此爾等當嚴加督率互相激勸有不勤習射藝嬉遊市  
肆者罪之

三月乙未蒙古博爾袞岱等來降

先是蒙古博爾袞岱哈喇爾岱巴彥岱等逃入明  
國既而率男子四百二十一人婦女幼穉共五百  
口攜馬騾二百一十有一毀大同陽和邊牆來降  
二月二十日至歸化城土默特章京古祿格遣納

木什哩等送至

賜博爾袞岱三人鞍馬繡緞朝衣冠帶橐鞬等物其餘在

歸化城者

賜銀一千兩又

賜納木什哩等銀兩有差

丁酉降睿親王多爾袞肅親王豪格並為郡王

睿親王多爾袞肅親王豪格安平貝勒杜度饒餘

貝勒阿巴泰等于五年十二月庚戌奉



命率將士之半往代鄭親王濟爾哈朗等圍困錦州擊敗  
明錦州松山援兵四百二十人斬二百四十人獲  
馬十五管旗大臣阿山先襲山城斬八人又克取  
小山城一座俘獲男子三十九婦女幼穉二十七  
馬羸五索海永順率兵四百堵截敵人去路及還  
時遇錦州兵三百人往小凌河畋獵擊斬九十二  
人其餘脫逃者遇安平貝勒杜度所率兵五百人  
又擊斬八十二人二月丙寅遣瞻岱奏報嗣因睿

親王多爾袞等于集代駐營時私遣每牛录甲士  
三人還家一次私遣每旗官一員每牛录甲士五  
人還家一次又移軍過國王碑離錦州約三十里  
駐營

太宗聞之震怒曰原令我軍由遠漸近圍困錦州今離城  
遠駐敵人必多運糧草入城以此相持致延日月何時  
能速成大功耶至是值鄭親王濟爾哈朗等更番往代  
之期因

命甲喇章京車爾布等齎

敕切責之令將倡議之人指名擬罪具奏並傳

諭王等至遼河先遣人來奏伊等俱駐于舍利塔候

旨隨遣內大臣圖爾格等往問睿親王等遣兵歸家及離

城遠駐之故多爾袞奏曰臣集衆議每旗先遣官

一員率每牛录兵五人還家修治軍械牧養馬匹

蓋錦州敵人馬匹皆在他處牧養內援之兵皆退

回養馬我等兵力有餘何畏錦州松杏三城之兵

衆以為然亦無一人勸阻者是倡議者臣也遣歸者亦臣也至離營遠駐因舊駐之處青草已盡特遠移以就芻牧耳但臣識庸慮短背違

上命尚復何言及問肅親王與二貝勒對亦如之又遍詢貝子公大臣以下各官皆如多爾袞所對比還奏

太宗曰爾等若臨城駐營使糧草不得入錦州而遣兵歸家猶可也今乃云移營就草豈專令爾等往彼牧馬耶如不能圍城亦當以不能之故奏明今乃飾詞自解是

貽誤衆人罪在爾等著令自行議罪圖爾格等以所議

奏

聞得

旨降睿親王多爾袞肅親王豪格俱為郡王貝勒阿巴泰  
以下各分別罰銀有差以阿山初到營時即以駐  
兵太遠向多爾袞言之免其罰銀之半

辛丑令各旗閒散人歸本屯居住

太宗諭戶部曰邇來盜賊充斥俱係貿易漢人糾黨為奸

凡貿易必有主令之人自宜於本旗地方或修市廛或就家貿易今乃有縱家人居別旗地方與別旗合夥者又有令其往來負販者俱按月勒索本息以致此等人無計措辦遂相率為盜嗣後若居別旗貿易及街市往來貿易之人有為盜者著將本主連坐既為貿易之主即有約束之責但令晝則貿易夜則歸家何自而為盜若聽其自便有所獲則利歸於己苟為盜則罪坐本人是直縱盜以為漁利之計耳且此等閒散之人容留京

師無益有損嗣今八家以下滿洲蒙古漢人官員人等  
各令家中閒散人俱歸本屯居住該管章京及家長各  
加意約束違者治本管官及家長之罪爾部亦嚴行稽  
察之

乙巳分編錦州蒙古貝勒諾木齊等歸降部衆

鄭親王濟爾哈朗武英郡王阿濟格等奉

命往代睿郡王多爾袞等圍錦州每面分立八營繞營俱  
濬深壕壕邊修築垛口兩旗中間復濬長壕近城

設邏卒哨探時明援兵前隊已至松山杏山錦州  
城中蒙古見我軍嚴整呼告邏卒等曰城中積粟  
可支二三年縱圍困豈可得耶邏卒應之曰無論  
二三年縱有四年之糧至五年後復何所食蒙古  
等聞之知我軍圍城志在必得皆驚恐于是城中  
蒙古貝勒諾木齊武巴什琿津清善山津古英塔  
布囊楚肯博博克泰昂阿岱蘇巴達爾漢滿濟額  
森托濟布達習等遂謀來降有一人聞之欲奔告



祖大壽武巴什等幽殺之遣二人持降書縋城下

潛入我營

其書曰我等知王貝勒等至早有歸順之心今貝勒諾木齊台吉武巴什等約

誓已定倡率衆蒙古請降至二十七日黎明時可遣兵四面來攻諾木齊守東門武巴什守南門若

不信我等有上天在有如天之

聖主在我等願為編氓納職貢若蒙鑒納幸賜回書可舉

信礮三聲為驗

濟爾哈朗覽書又細訊之與諸王貝勒大

臣等定議約于二十七日兵必前進遂舉信礮為

驗並遣啟心郎額爾克圖持其降書馳奏是日祖

大壽探知其事遂整兵以待會日暮至外城門遣

副將遊擊各一人率兵欲以計擒之為武巴什等所覺即持兵器以迎外城蒙古等亦爭執兵器既接戰聲聞關外濟爾哈朗阿濟格多鐸等相繼至城下策應關內蒙古鮑繩城下我軍陸續援繩而上于城上吹角夾攻明兵明兵敗入城內我軍遂乘勝入關將城中蒙古男婦及一切器物盡送義州士寅鄭親王濟爾哈朗等遣護衛代袞等奏言臣等于三月二十四日薄暮聞錦州關內蒙古兵

與明兵接戰兩白旗相去甚近率兵先登左右之  
兵繼之俱至外城諾木齊等盡率其官屬兵丁以  
降都司守備把總等官八十六員男婦幼穉共六  
千二百一十有一人時喀喇沁部古魯思希布具  
筵進獻適捷音至

太宗大悅

命八門擊鼓召衆于

篤恭殿宣捷翼日諾木齊武巴什等將至先

命多爾濟達爾漢諾顏揚善等至廣城迎宴之甲辰  
親率諸王貝勒及文武各官出懷遠門迎至演武亭  
太宗率衆拜

天行禮畢

升御座諾木齊武巴什等率部衆朝見令諾木齊武巴什  
等較射又令大臣侍衛等較射選力士角觝

賜大宴宴之諾木齊等進獻雕鞍馬匹琥珀念珠金銀器  
皿蟒衣等物俱却之

諭之曰爾等進獻具見悃忱但歸誠伊始朕當加恩賞賚  
宴畢仍自懷遠門入還宮乙巳以諾木齊武巴什攜來  
蒙古一千五百七十有三名漢人一百三十有九  
名婦女幼穉二千六百五十五口編為九牛录每  
三丁一人披甲諾木齊部下蒙古二百有四人分  
隸正黃旗武巴什部下蒙古七百有二人分隸鑲  
藍旗阿邦伊木圖文都爾瑚滿韜部下蒙古五百  
五十三人分補各旗之缺額者令諾木齊武巴什

秩視梅勒章京阿桑喜滿韜額布根海塞巴布岱  
額布格爾德琿津秩視甲喇章京巴布岱之弟鄂  
爾洪安達哈山津多爾津伊木圖文都爾瑚阿邦  
等秩視牛录章京並達爾瑪古什等以下各

賜頂帶朝衣鞍馬弓矢甲冑綵緞布匹銀兩莊田牲畜等  
物有差七月己亥復

賜諾木齊武巴什部下分得撥什庫鐘化額森博波克托  
席柱等莊田奴僕朝衣冠帶鞍馬甲冑弓矢粧緞

布疋銀兩等物有差

夏四月甲寅以元史伯延事

諭誠睿郡王多爾袞等

太宗召內院諸臣入

清寧宮

命讀元史至世祖遣丞相伯延往征宋國時值炎天恐行  
軍不利敕俟入秋再舉伯延奏曰宋之據江海如  
窮獸之負隅今已受困旋復縱之則逸而逝矣遂

起兵南征統一天下乃遣大學士范文程剛林等  
至

篤恭殿傳

諭睿郡王多爾袞等曰元世祖恐炎熱敕伯延侯入秋伐  
宋伯延論奏必舉遂興師滅之今汝等不圍困錦州屯  
兵遠處任意畋獵急圖歸家視彼為何如也朕非窮究  
爾等特以伯延勤國之心令爾等知之耳多爾袞等皆  
慚謝而退



甲子定各牛录披甲名數

太宗召衆于

篤恭殿

諭曰八家所屬各牛录舊取辦事人四名銀匠五名今宜各退辦事人二名銀匠二名王貝勒等各令家下漢人學習匠役待三年後再將各牛录匠役停止每牛录滿洲三人中許一人披甲以六十名為常數其中或多或少務于三人中選一人他牛录甲雖有餘不許補不足

者有舊披甲人詐稱年老令家奴代披及牛录章京之子徇私不令披甲者各管旗大臣稽察之如稽察不公致被首告者罪之

五月丁丑鄭親王濟爾哈朗等敗明總督洪承疇兵于松山

先是三月己亥

太宗命朝鮮總兵柳林副將刁和良丁天機米塔尼任大尼率兵千人廝卒五百人馬一千五百五十匹往

助鄭親王濟爾哈朗圍錦州四月丁未復遣阿哈  
尼堪索爾果東果羅車克等率每牛录兵五人赴  
錦州助之是日至巳酉鄭親王濟爾哈朗等連次  
奏報明人援兵自杏山至松山濟爾哈朗阿達禮  
羅洛宏等率右翼兵伏于錦州南山西岡阿濟格  
多鐸等率左翼兵伏于山之北嶺令前鋒兵往誘  
敵兵及敵兵來追我左翼伏兵齊出前鋒兵返擊  
右翼伏兵又追擊其後大敗之陣斬一百七十人

獲馬一百六十匹甲七十六副共俘獲人數四千三百七十有奇明人恐我軍掘壕圍斷高橋將援兵撤回或云屯駐寧遠或云已過寧遠又蒙古名古什者原與諾木齊武巴什等同謀歸附因衆蒙古降時未能偕出隨越城來降墜傷肱今並攜之以歸庚戌

命恭順王孔有德智順王尚可喜各率本部將士往助鄭親王濟爾哈朗軍至是濟爾哈朗復遣刑部啟心

郎額爾克圖等奏報明總督洪承疇率總兵六員  
兵六萬來援錦州屯於松山北岡我軍擊敗之斬  
首二千級尋

命內院大學士希福剛林等往錦州閱視濟爾哈朗等所  
濬壕塹兼閱屯營形勢

己丑迎宴索倫歸降部衆

索倫部蒙塞爾瓦岱之子巴爾達齊于是月丁亥  
率其戶下二百四人來降越二日己丑又有索倫

部一千四百七十一人來降俱

命迎至北驛館宴之

壬寅築歸化城外牆

太宗遣牛录章京萬塔什筆帖式塞稜等齎

敕諭駐防歸化城土默特章京古祿格等曰爾等所居城

小壕狹倘敵人來侵難容屯駐人口牲畜有一被掠實

損軍威爾等可于城外築牆酌量足容爾部人衆其牆

高三丈五尺寬可駐營牆上遍築垛口四面留門每門

俱置甕城爾地產木甚多每門及四角各建樓于其上  
牆外俱濬深壕修理完備爾等各率將士登之分立汛  
地敵人若來可立于垣上迎戰遣去章京即令督工事  
竣方還毋違朕命

六月丁未朝鮮國進瑞金却之

朝鮮國王李倬進獻瑞金遣陪臣李僈齎咨禮部

其略云咸陽郡新溪書院下民人表年夜見室中  
有光即其地掘之得瓦甕上書一千年三字發視  
有黃金二十四片上刻宜春大吉四字考新溪書  
院係新羅古寺遺址想前有神人刻留吉兆以為

異代休徵非天地所秘鬼神所護豈有至今始出  
之理竊稽前史玉杯銀甕瑞應休明伏惟

皇上光膺

天命肇創大業威烈震于寰宇仁恩洽于遐荒神人交贊

嘉祥懋集今年吉金忽發于

大朝所庇之藩境其為

盛世嘉瑞昭昭無疑謹將原金

進獻以表尊事之誠云

禮部以

聞得

旨新羅藏金為朝鮮所得王即進獻足見誠敬其所刻字

樣允屬休徵朕當與王共荷嘉祥王其自受即與朕受

無異著將原金付李倬齎回是日遣倬等歸國



賜貂皮銀兩等物仍

賜宴于禮部

辛酉睿郡王多爾袞鄭親王濟爾哈朗等合軍敗明  
援兵于松山

初睿郡王多爾袞肅郡王豪格等聞錦州蒙古投  
降令大學士范文程等代請前往効力贖罪

太宗責之曰前者離城遠駐任意畋獵行樂今欲乘人之  
功掩為己有耶後以范文程等言始令入署視事都察

院參政祖可法等復為奏請乃許朝見仍

命率將士之半往代鄭親王濟爾哈朗軍至是侍衛岱衮  
喇世塔錫達禮等自軍營還奏鄭親王濟爾哈朗  
武英郡王阿濟格等與更代之睿郡王多爾袞肅  
郡王豪格等兩軍合營偵知明關內援兵出松山  
城沿海前進我左翼軍向松山之東右翼軍向松  
山之西追之左翼軍追及掩殺至松山城壕敗之  
獲馬五十餘匹丙寅遣學士羅碩詣錦州睿郡王

多爾袞營并附大凌河歸附官員祖澤潤曹恭誠

裴國禎祖澤洪孫定遼陳邦選蕭永祚等與祖大

壽書

書曰自大凌河分秋十餘年矣兩不能相見皆將軍自誤之也昔日隨將軍素暗投明同

赴

皇帝行營傾心投順彼時將軍向職等云是我輩

仁聖之真主也及今十年職等蒙

皇上養養厚恩始終如一豈料將軍入錦州過聽妻孥之

言背盟負

恩跋扈自衛致今日困守錦州無顏相見是今日之錦州

即昔日之凌河昔日之負盟直今日之報應料聞城生靈已為釜中之魚在將軍尊由自作而職等

家眷之在錦州者尚有五十九人皆非負義忘恩之輩何事為殘黎充饑之食為此哀懇我

皇上俯准職等列名致書將軍請發各家大小人數送出

卷二十九

死地探將軍之意仍慮南朝法令不肯發出耳不知既在國中南朝法亦難加將軍妄想外兵救援據我國挽回之兵民投降之蒙古言大小將士無不痛恨將軍昔日斷送凌河今日斷送錦州皆云不知將軍有何主見致我等困守受戮則將軍之無可望也明矣敢以明告勿執迷不悟自悞以悞職等之妻子也

庚午睿郡王多

爾袞等復遣侍衛雅賴吉賽漢褚翰等奏報明關內援兵出松山來戰我滿洲蒙古兩翼會合追擊五里獲馬五百七十還

秋七月戊寅

賜考取舉人生員等朝衣緞疋有差

內三院大學士范文程希福剛林等奏請于滿洲  
蒙古漢人內考取舉人生員

太宗諭曰忠經云在官惟明莅事惟平立身惟清聽不可  
以不聽視不可以不明清則無欲平則無曲明能正俗  
聽則審于事明則辨于理爾等當善體此言從公考核  
至是

賜新中式舉人滿洲鄂謨克圖赫德蒙古都當漢人崔光

前卅三元章于天下為鳳各朝衣一領一等生員  
滿洲科爾科岱帕帕克禮漢人盧震陽劉漢祚劉  
可斌魏際陞金元祥線縉徐效奇劉遇知楊天祐  
各緞一布二二等生員滿洲琿達碩瑪額依們蒙  
古索諾木漢人李惟樸金元禎傅天祥李棲鳳孟  
繼昌佟鳳彩徐起元金應乾劉靜岳陳九奇王一  
品各緞一布一三等生員滿洲葉成格綏和多碩  
塞莽色蒙古巴朗漢人江名世李貴王世勛劉應

錫李茂王畿貴姜念鄭一元楊自得董景秀銀器  
重董成效董宗聖各布二

八月丁巳

太宗親統大軍征明錦州

先是初六日巳酉睿郡王多爾袞等遣瞻岱安泰  
奏報明國會集各省兵來拒我師我軍擊敗其三  
營獲馬五百五十匹敵兵來者甚衆

太宗即于是日遣學士額色赫往

諭睿郡王多爾袞肅郡王豪格曰敵人若來侵犯王等可  
相機擊之不來各固守汛地切勿輕動甲寅額色赫還  
自軍中奏言敵兵甚衆乞遣鄭親王率兵一半前  
往協力拒敵

太宗聞奏即檄各路兵馬星夜進京

命鄭親王濟爾哈朗留守

盛京丁巳辰刻

親統大軍出撫近門謁



堂子行禮畢啟行赴錦州戊午渡遼河睿郡王多爾袞等  
奏報明總督洪承疇兵犯我右翼肅郡王豪格率  
兩紅旗正黃旗鑲藍旗及外藩土謝圖親王兵擊  
敗之時

太宗患鼻衄因行急衄益甚三日方止諸王貝勒大臣奏  
請

聖駕徐行臣等當先往

諭曰行軍制勝利在神速朕恐敵人聞朕親至將潛遁耳

如不逃破之如縱犬逐獸易于拾取朕此時如有翼可飛即當飛去何可徐行于是晝夜遄程自

盛京疾馳而進凡六日抵松山之戚家堡

駐蹕遣大學士剛林學士羅碩往

諭睿郡王多爾袞等曰朕當即至矣可令前遣之宗室拜音圖額附英固爾岱兵及科爾沁部土謝圖親王兵察哈爾索諾木偉宰桑等兵先在高橋駐營俟朕至高橋合圍松山杏山多爾袞豪格等復令剛林羅碩還奏臣

等聞

聖駕親臨勇氣倍增惟務進攻宜敢畏怯但觀明兵甚衆  
臣等前率兵圍錦州屢經攻戰微有損傷如再速  
戰恐力有不及頃

皇上諭令屯營高橋倘敵兵為我所迫約錦州松山兵內  
外夾攻協力死戰萬一有失為之奈何

皇上即欲自高橋來援亦必待勝負少分之後今如暫駐  
松山杏山之間則臣等大幸

太宗允之先陳師於松山繼于松山杏山之間自烏忻河  
南山至海橫截大路綿亘駐營

諭衆曰如敵來犯近則迎擊之倘敵兵尚遠而先往迎戰  
致累于衆即與敗陣無異是時明領兵總督洪承疇巡  
撫邱民仰兵道張斗姚恭王之楨兵部郎中張若  
麒大同總兵王樸宣府總兵李輔明密雲總兵唐  
通薊州總兵白廣恩玉田總兵曹變蛟山海總兵  
馬科前屯衛總兵王廷臣寧遠總兵吳三桂及副

將遊擊二百餘員率馬步兵十三萬于松山城北  
乳峰山岡結營其步兵于乳峰山松山城之間掘  
壕立七營其騎兵營于松山東西北三面見

太宗親率大軍環松山而營大懼一時文武各官欲戰則  
力不能支欲守則糧已不繼遂合謀欲遁

乙丑

太宗破明兵十三萬于松山

癸亥黎明明總兵八員率兵犯我前鋒汎我軍擊

卷二十九  
敗之將奔塔山為前鋒軍及鑲藍旗護軍追擊

太宗命武英郡王阿濟格貝子博洛內大臣圖爾格等追  
至塔山而還獲其筆架山積粟留兵守護遂濬壕  
斷松山杏山路是夜明諸將皆欲遁撤其步兵七  
營近松山城而營甲子敵兵犯我鑲紅旗汛我軍  
擊却之師還敵襲我後相拒百步

太宗復令轉戰張黃蓋率數人往來指揮布陣敵望見倉  
皇遁走遂還營

諭諸將曰今夜敵兵必遁護軍統領鰲拜阿濟格尼堪漢  
岱哈寧阿等可率左翼四旗護軍至右翼汎地排列右  
翼四旗護軍及騎兵前鋒蒙古等兵俱比翼排列直抵  
海邊見敵兵遁者有百人則以百人追之千人則以千  
人追之如敵兵衆多則躡後追擊直抵塔山是夜初更  
時明總兵吳三桂王樸唐通馬科白廣恩李輔明  
等率馬步兵由前鋒汎地沿海潛遁我軍相繼追  
擊

命蒙古管旗大臣庫魯克達爾漢阿賴察哈爾茂海等各率所部兵于松山路設伏遮擊不許遠追若無諭旨不得擅還又

命睿郡王多爾袞及貝子洛託公屯齊率先至四旗護軍及科爾沁土謝圖親王兵前往錦州至塔山大路橫擊之又

命達齊堪辛達哩納林等率鎗礮手往筆架山增兵防護糗糧又



命鎮國將軍宗室巴布海護軍將領圖賴往截塔山路又  
命武英郡王阿濟格亦往塔山截擊之倘敵兵欲越塔山  
則率巴布海圖賴自寧遠直抵塔山追擊又

命貝子博洛率兵往桑噶爾齋堡截擊又聞明兵部郎中  
張若麒從小凌河口乘舟遁

命蒙古梅勒章京賴護及察哈爾部下巴特瑪率兵往追  
之又

命管旗大臣譚泰率騎兵四百往小凌河西直抵海濱絕

其歸路又

命梅勒章京多濟里追擊敗兵又

命蒙古管旗大臣伊拜梅勒章京譚拜于杏山四面夾擊  
敵兵之奔入杏山者不許遠追如無

諭旨亦不得擅還又

命蒙古管旗大臣恩格圖前鋒將領武拜等追擊逃兵又  
命阿什達爾漢及多爾濟達爾漢諾顏往視庫魯克達爾  
漢阿賴伊拜等杏山駐營處如其地未善即擇善

地移營並察其斬敵多寡

太宗又計我軍若于是夜一併遣發恐敵人復有逃竄者  
于是相敵形勢陸續遣發黎明諸將遵奉

上命各赴汛地邀截悉如

睿算掩擊窮追明兵竄走彌山遍野死者不可勝計乙丑  
命睿郡王多爾袞武英郡王阿濟格圍塔山四臺復

命漢軍管旗大臣劉之源吳守進侍衛李國翰等攜紅衣  
礮十位往助攻克之生擒臺內副將王希賢參將

崔定國都司楊重鎮斬都司一員守備二員明總兵吳三桂王樸奔入杏山是日

太宗移營松山將四面濬壕圍之明總兵曹變蛟撤乳峰山馬步兵棄寨宵遁欲突圍出至鑲黃旗汎地者一至正黃旗汎地者四俱為我軍擊敗一半突入御營我侍衛親軍力禦之曹變蛟中創奔還松山乳峰山所遺大小礮位軍械無算我軍俱獲之丁卯

命內大臣錫翰等及四子部都爾拜各率精兵二百五十

一伏于高橋大路一伏于桑噶爾齋堡以杏山逃  
兵必由此路出也又

命甲喇章京綏遜格爾泰等率三旗護軍一百五十往助  
錫翰等軍是日果有敵兵千人自杏山遁出遇錫  
翰等伏兵敗之追至塔山多所斬獲比還

太宗親率軍至高橋東

命貝勒羅洛宏貝子博洛內大臣圖爾格等每旗精兵二  
十名及正白旗護軍翁牛特部兵錫翰所領兵俱

付貝勒多鐸令設伏以待己巳明總兵吳三桂王  
樸率兵自杏山出奔寧遠我前鋒軍見之自杏山  
西截入大路追擊敗奔至高橋多鐸等伏兵四起  
阻截前路追兵復躡後盡殲其各路潰竄之兵三  
桂與樸僅以身免次日搜勦山野獲甲冑軍械馬  
匹無算

太宗又命內大臣塔瞻等率每旗精兵五十往高橋設伏  
甫出營遇明步兵千人自杏山潰遁悉斬之比至

高橋復盡殲騎兵八十步兵六百先後通計斬殺  
敵衆五萬三千七百八十餘獲馬七千四百四十  
有四駝六十有六甲冑九千三百四十有六明兵  
自杏山南至塔山赴海死者甚衆所棄馬匹器械  
以數萬計海中浮屍漂蕩多如鴈鷺

太宗神謀勇略制勝出奇破明兵十三萬如摧枯拉朽指  
顧而定昏夜中我軍誤傷者止八人廝卒二人是  
時被圍于松山者惟總督洪承疇巡撫邱民仰兵

道張斗姚恭王之禎同知張為民嚴繼賢通判袁  
國樹朱廷榭總兵王廷臣曹變蛟與祖大樂等兵  
不過萬餘城內糧草已絕我軍復掘外壕困之總  
兵吳三桂王樸白廣恩馬科李輔明唐通郎中張  
若麒等各路潰竄未有成隊逸出者于是連遣學  
士羅碩筆帖式扎布海等至

盛京宣布捷音

士申以



敕諭松山城守官兵

太宗敕諭松山城守官兵曰朕率師至此知爾援兵必潰  
預遣兵圍守松山使不得入自塔山南至于海北至于  
山及寧遠東之連山一切去路俱截之又分兵各路截  
守陸路斬殺者積屍遍野投海死者更不可勝數今爾  
援兵已絕此乃

天意佑我也爾等以為止圍松山錦州其餘六城未必受  
困不知時勢至此不惟六城難保即南北兩京亦豈能

復有耶朕非虛言昔征朝鮮時圍彼國王于南漢山諭之曰爾降必生全爾後國王果降朕踐前言仍令主其國後圍大凌河時總兵祖大壽來降亦不復殺仍恩養之諒爾等所素聞也爾等可自思之是日前鋒將領努山等自明董家口喜峰口偵探回擊敗步哨五十營斬一百四十五人又斬騎哨十一人生擒守備一員兵七人遇我國逃人殺男子二人獲婦女

二口



皇清開國方略卷二十九